



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima




tir yimiyim

TAPAK 8

**China Tir Xi-i Africa atema mapa million ka agütsütsü nangzük**

**Taküm Ballon d'Or nominee nung Messi aser Ronaldo mali**



VOL. XXI ISSUE NO. 324 (ADOK 324) DIMAPUR ROGONÜ (FRIDAY) RONGJUI (SEPTEMBER) 06, 2024 ₹ 5.00

## CM Rio-i anentsüh aluba tesem sendang

**Dimapur, September 4, 2024 (TYO):** Chief Minister Neiphiu Rio-i National Highway-29 nung anentsüh aluba tesem Pherima sendangogo. Iba lendong nung nisung 6 aser kiojen aika raksatsüogo.

Chief Minister Rio-i anentsüh ajanga raksatsüba tesem ajunga sendang aser iba sülen Pherima nunger den ajurutepa sensaksendang sorkari telangzüba tajung agütsütsü nangzük.

CM Rio-isa National Highways and Infrastructure Development Corporation Limited (NHIDCL) ketdangsurtem den ajurutep aser tang rongdak nungdakbatem belentsü atema National Highway-29 nung lane ka

lapoktsü tetuyuba agütsü.

Iba mapang Chumoukedima Deputy Commissioner Polan John-i CM Rio meina senzü.

Urban Development & Municipal Affairs Department Advisor Zhaleo Rio-ia Pherima aser Kukidolong nung anentsüh aluba tesemtem sendangogo.

Paisa nübertem den ajurutepa parnok khurettem metetpelar aser anentsüh ajanga takoksa bentsür aruba kuli noksa agir bangdakpur ket nung agütsütsü metetdaksü.

Contractor aser Nagaamii Infra.con. Pvt. Ltd. kibur Rokolhu Angami-i National Highway 29, Pherima Village nung anentsüh yadok aser gari raksaa alibatem agienogo.

## Dimapur nung Common Teachers' Day among

**Dimapur, September 4, 2024 (TYO):** DoSE, Dimapur District aser All Nagaland Private Schools Association Dimapur Unit ajanga tanü Common Teachers' Day ayonga mongogo.

Iba sentong ya Bethesda Higher Secondary School Auditorium, Walford, Dimapur nung agi.

Iba sentong nung Dimapur Deputy Commissioner Dr. Tinojongshi Chang, NCS-i tetushi süa jaoker ka ama shilem agi aser pai District Education Officer (DEO) aser All Nagaland Private School Association (ANPSA) Dimapur unit dang tesayurtem nem tetushi agütsüba sentong ayonga agiba atema tenüngsang agütsü aser pelaba metetdaksü.

Shisaliok rejutem nung children with special needs asoshi facility agütsüba school aser tesayurtem dang kanga pelar. Iba

ajanga parnoki kasa maongkatem angutsü, ta Dimapur DC-i ashi.

"Tesayurtemi shisatsü agütsüba dang masü saka kaketshirtem akasodaksür aser tayongzükba balala nung len anir. Tesayurtem ya loktiliba yanglurtem lir aser tarutsü putu anitetertem lir" ta Dr. Tinojongshi-isa ashi.

Tesayur kaji shimo milen ka ama lir, tangar nem tesangwa agütsütsü atema pa sasa rongdemer ta Mustafa Kemal Atatürk-i ashiba olen paisa nenshia metetdaksü.

Iba sentong nung Martha Angami (GHSS Dimapur), Shikat Shohe (PM SHRI GHS Burma Camp), Imnajungla (Little Star Higher Secondary School) aser Limanaro (Department of School Education, Dimapur District) nunger nem District Award agütsü.

## Dimapur nung IBH&IC amenoktsü

**Dimapur, September 5, 2024 (TYO):** Forest Colony, Dimapur nung aliba Shopping complex nung Integrated Business Hub and Innovation Centre (IBH&IC) amenoktsü atema Department of Environment, Forests, & Climate Change, Nagaland-i September 5, 2024 nü temelaba agütsüogo.

Environment, Forests & Climate Change Minister C L John lia Principal Chief Conservator of Forests & Head of Forest Force Dharmendra Prakash-i Principal Secretary and Development Commissioner, R Ramakrishnan nem Memorandum of Understanding

(MoU) agütsü.

Iba MoU nung küm 10 atema Shopping complex agütsüba zülutepa lir.

Ano, IBH&IC tiptema inyaksangshia aotsü atema department 4- Environment, Forests & Climate Change, Industries & Commerce, Planning & Transformation and Investment aser Development Authority of Nagaland tsüngda MoU ka nung sign sütep.

IDAN kübok IBH&IC nung maparen tenzüksü aser iba ajanga Nagaland nung rongsenketzung renloktsü asoshi tapak tasen ka tenzüksü.

## Union MoS Ramdas Athawale-i Nagaland sendanger

**Dimapur, September 5, 2024 (TYO):** Union Minister of State for Social Justice & Empowerment Ramdas Athawale-i Hokolbarnü Agri Expo, 4th mile nung Mandi project atema lung azüngba sentong nung adentsü.

ana atema Nagaland sendangi arutsü aser pa Hokolbar anüngdang Dimapur atongba sülen Sovima nung Chief Minister Neiphiu Rio den ajuruteptsü.

Paisa Honibarnü Niathu Resort nung Social Welfare department ketdangsurtem den ajurutepa sülen Delhi-i apusoa aotsü.

## Tesayur 14 nem tetushi agütsü; Students' Health Card sayaogo



**Kohima, September 5, 2024 (TYO):** Teachers' Day 2024 nung tesayur 14, sorkar school 10 aser nija school 4 nem tetushi agütsüogo aser tanü anogomung nung Nagaland sorkari Students' Health Card sayatsüogo.

School Education Department-i ayongzükba State Level Teachers Day benjung NBCC Convention Hall nung among.

Taküm takok angurtem ya Khrielie Paphino (Primary Teacher, GMS, Pfuchama, Kohima); T. Chiye, (Primary Teacher, GMS, Sanglao, Noklak); L. Yajao Konyak (Assistant Teacher, EastWood School, Mon); T. Setsatsi Sangtam (Primary Teacher, GPS, Phoya A, Tuensang); T. Airong Konyak (Physical Education Teacher, GHSS, Mon); Avino Peseyie (Graduate Teacher, GHSS, Chumuokedima); Alokandanda Das (Assistant Teacher, Holy Cross Higher Secondary School, Dimapur); Z. Chimjiba (Assistant Teacher, St. Xavier Higher Secondary School, Shamator); Hanchulo James (Graduate Teacher, GMS, Tesophenyu Upper, Tseminyu); Baleshwar Mahato (Graduate Teacher, GHSS, Tobu, Mon); Peleno Petenilhu (Post Graduate Teacher, John Government

Higher Secondary School, Viswema, Kohima); Kekhrieneino Catherine Senotsu (Post Graduate Teacher, Rüzühkhrie GHSS, Kohima); Rongsenkhal Aonok (Assistant Teacher, Queen Mary Higher Secondary School, Mokokchung) aser Joseph K V, (Senior Teacher, GHSS, Mon) nunger lir.

Tanü sentong nung School Education Advisor Kekhrielhoulie Yhome-i Students' Health Card tenzüksü. Iba ya Health and Family Welfare Department den yaritepa tenzük.

Health Card ya health awareness, health metrics meteta kümdaksütsü, tekaratiba nung temang anepalutsü aser tsürabur-tesayur amalitepa akangshia kaketshirtem temang anema lidaksütsü atema lir.

"Tesayurtemi bendanga agütsüba, len aniba aser yariba atema asenok ajaki pelaba metetdaksütsüla. Tesayurtem shisatsü agütsüba dang masü saka life lessons aser skills sayur. Parnoki asenok dang taochi alitsü, tangar yaritsü, ochishitsü aser mangdang tulu yur meranga inyaksü sayur" ta Advisor Dr. Yhome-i ashi.

"Parnoki shisaliok wadang nung shilem agiba aser asenok dang len sayuba den tarutsü tajung yangerba asoshi tushir" ta

paisa ashi.

India nung school züngtor anener teimbaji Nagaland nung lir aser iba atema temulung raksar. Anungji tesayurtem aser department-i iba asoshi mapa inyaksü ayongzük, ta Dr. Yhome-isa ashi.

"Nagaland sorkar mapa inyakerem rongnung nübo teimtiba aliba department tanabubaji Education department lir aser quality education agütsütsü atema mapa inyaker. Department-i taruba ita 18-24 tsüngda district shia nung 16 LightHouse Schools renemtsü" ta pai metetdaksü.

"Tesayurtem ya asen tarutsü atema lennirtem aser akhüm agütsürtem lir. Nenoki kaketshir taküm aika nung konghiogo aser parnok pungmang ataloktsü atema ajungmesogo" ta Nagaland Board of School Education Chairperson Asano Sekhose-ia ashi.

Tesayurtemi lanurtem anitetba atema tenüngsang agüja benjungtepba mapang asenoki NEP 2020 nung lateta aliba ama teaching learning process melenshitsü merangdi, ta lai ashi.

Teachers Day tenüng nung School Education Principal Director Thavaseelan K-i Hokolbarnü Nagaland nung school ajak sodi anogo asütsü metetdaksü.

## Western Sümi Hoho-i Capital Bypass Road yanglutsü akhanger

**Dimapur, September 4, 2024 (TYO):** Chief Minister Neiphiu Rio-i mapang shitak nung anentsüh aluba tesemtem sendangba ajanga pai nübertem asoshi bilemstüba sayur ta Western Sümi Hoho (WSH)-i ashi.

Maneni, Urban Development and Municipal Affairs Advisor Zhaleo Rio-ia anentsüh aluba tesemtem sendangba aser tensa osang metetpelaba atema pelar ta parnokisa ashi.

Iba ajanga mapa tajung kar inyaksü yongyaa atar aser

Pherima den tanga tesemtem nung takoksa angurtem nem senotsü aser tanga teyari agütsütsü imlar ta Media Cell, WSH-i sangdong ka nung ashi.

Capital Bypass Road nung ali melen temenok ken o ya küm aika tejakdang yimtsüng ana den angatettepogo. Anungji Capital Bypass lenmang nung mapa tangsa tenzüksü akhanger aser subcontract maparen magizük, ta WSH-i ashi.

Iba mapa ya mezüng M/s. Vilelie Khamo & Sons nem lemzüksü aser iba sülen M/s. Hi-

Tech Construction & Co den tanga third party ka nem subcontract agütsüogo. Iba mapa ya khen meyipa reprangshimtsüla aser mapatong inyakba nung tenük yoktsü nungdaker ta parnokisa metetdaksü.

NH29 melena tongtipang lenmang ka ajiteta M/s. Vilelie Khamo & Sons, M/s. Hi-Tech Construction & Co aser third-party subcontractor nungeri mapa teblemstü khuret ajak agia mapa inyaksü imlar ta Western Sümi Hoho-isa ashi.

# State tesem ajunga nung Teachers' Day mungogo



Noklak

Wokha

Zunheboto

**Dimapur, Rongjui/Sept. 05 (TYO):** Linük ajunga den külemi Nagaland kübok tesem balala nung September 5, 2024 nü Teachers' Day nungtem nung sentong balala ayongzüka kaketshir temi tesayurtem tushia liasü.

**ZUNHEBOTO:** Zunheboto District nunga September 5, 2024 nü Town Hall, Zunheboto nung 63 buba Teachers' Day munga liasü.

Shisashir, scholar, tesayur, yimten yimsüsür, India indang tatong tir mezüngbuba aser tanabuba tir inyaksang Dr. Sarvepalli Radhakrishnan asoba anogo nung Teachers' Day ya amunger.

Iba anogo GHSS Satakha nungi M Samuel Sema, GT; GMS Surumi nungi Hewoto, UGHT; Sovishe Memorial GHS, nungi Nguvili aser Woodland HSS nungi Avitoli A Ayemi, GT nungtem nem Teachers' Award agüja liasü.

Iba sentong nung Guest Speaker, Deputy Commissioner Zunheboto, Rahul Bhanudas Mali, IAS ajanga Dr. Radhakrishnan takum otsü tongmelang agi lemsatop aser kaketshirtem lenmang tajung nung anitetsü atema tajungtiba nung mapa inyaksü ayongzüka liasü.

**TSEMINYU:** Kasa anogo Tseminyu District Teacher's Day celebration cum Teacher's Award 2024 sentong ya Baptist Higher Secondary School Auditorium Hall, Tseminyu nung ayongzüka

liasü. Iba sentong nung akhumtong SDO (Civil), Tsidi-i tesayurtem den tayongzüka o jembia liasü.

Iba sentong nung Hitilo Kath, G.T (Science) GHSS, Tseminyu nem Teachers Award & Citation 2024 agüja liasü.

Sentong nung Hechulo Semy, principal GHSS, Tseminyu ajanga pela agizükba o jembia aser K. Munenle Tep AHM, Government High School, Tseminyu ajanga tepela o jembia liasü, kong DBS Tseminyu ajanga temeja ken ka

aten, GHSS Tseminyu ajanga telok ken aten, aser Khenlo G. Seb & Nyizanih Apon nati tesayurtem tushia sangro zünga liasü.

**WOKHA:** District Education Department, Wokha ajanga September 5, 2024 nü Lotha Hoho Ki, Wokha nung Teachers' Day sentong ayongzüka, kong Deputy Commissioner Wokha, Vineet Kumar, IAS sentong akhumdong ama dena liasü.

DC Wokha, Vineet Kumar-i sentong nung jembidang, tesayur temi pei agitsü meblemi mapa tajung inyakba ajanga nübrtemi nenok tushir aser senso tajung kaka kumdahtsüsü kaketshirtem anitetsü nenok dak keta lir ta ashi.

Pai tesayurtem dang maneni bendanga agütsür den züktsü ajungshi aser ano life skills amala sayutsü ayongzüka liasü.

Iba anogo Binod Pariyar (G/T Science) GHSS Bhandari; H.

Lidemo Tungoe (G/T Math) GHSS Wokha; Assistant Teacher, T. Rosana Lotha, Mt. Sinai School aser M. Benchumlo Humtsoe, GMS Tsungki nungtem nem kulizüng kakets sen senpet agüja liasü.

Iba sentong nung Sr. SDEO, Wokha, Z. Chanbemo Kikon-i Teachers' Day anogomung indang rateta ashi aser school balala nungi kaketshir temi kenten-menü aser sangro agi shilem agia liasü.

Maneni Pastor, Wokha Town Ao Baptist Arogo, Tayong Lemtur-i tesayurtem asoshi balaka sarasademja liasü.

**NOKLAK:** Linük ajunga den külemi Khiamniungan Students Union-ia District Administration aser School Education Department Noklak den lungjemer Public Ground, Noklak nung Brehostibarnü "En-powering education for a sustainable future" omen nung ajemdaker Teachers' Day nungtem nung sentong ka ayongzüka liasü.

Sentong nung Deputy Commissioner, Noklak, Arikumba-i tesayur nem tenüngsang agüja jembia aser linük kati takok angutsüji tesayur temi sayuba nung ajemdaker lir ta ashi.

Noklak district ya tasen aser lanur ka dang alinung tayongzüka balala ajurutsü, anungji ajaki lungjemer district tejakleni terenlok nung aotsü asoshi inyaksüla, ta pai

ayongzüka. President, Eastern Nagaland Students Federation, Chingmak Chang-i iba sentong nung jembidang tesayur temi kaketshirtem lenmang tajung nung anitetsü asoshi anibelem mesasai inyakba atema tenüngsang agüja liasü aser pei mapa nung ochishia inyaksü ayongzüka.

SDEO incharge Noklak, Y. Khongkhao-i state teachers' award angur KV Joseph, Senior Teacher, Holy Angels School, Noklak aser T. Chiye, PT GMS, Sanglao nem tenüngsang agütsü aser B. Ruth, PGT, GHSS Noklak aser P.L Shingnya, GPS Noklak Village na nem District Teachers Award agüja liasü.

Iba sentong nung Noklak district kübok government aser private school balala nungi kaketshir aser tesayurtem dena liasü.

**KIPHIRE:** Kiphire nung Teachers' Day ya DEO Office, Kiphire ajanga Hopongkyu Memorial Hall nung September 5, 2024 nü ayongzüka, kong sentong akhumdong ka ama Additional Deputy Commissioner, Kiphire, Longdiba L. Sangtam, NCS dena liasü.

ADC Kiphire, Longdiba L. Sangtam-i iba sentong nung jembidang tesayur nem tenüngsang agütsü aser pei yimya tajungtem ajanga

kaketshirtem ajungmesotsü ayongzüka liasü.

Iba sentong nung G.Omega Sema, PGT (Pol.Science), GHSS Pungro; S.Likhumla Sangtam, GT (General), GHSS Kiphire; A.Mughali Sumi, PT, GHS, Sitimi Town nungtem nem Kiphire District Teachers Awards 2024 agütsü aser Vika S. Sumi, GT, GHS, Sitimi Town; T.Lingholongba, PT, GMS, Yingshikur; Tsupaishi, PT, GMS, Longya Ward, Kiphire nungtem nem District Teacher's Award 2023 agüja liasü.

**BHANDARI:** SDEO Bhandari ajanga Public Ground, Bhandari nung combined Teachers' Day sentong September 5, 2024 nü ayongzüka liasü.

Iba sentong akhumdong ama MLA & Chairman SDPDB Bhandari, Achumbemo Kikon-i jembidang tanurtem lenla balala nung dangar menepa anitetba atema tesayur nem tenüngsang agütsü aser pei mapa nung tejak tenteta aser akhum agüja inyaksü ayongzüka liasü.

Paisa tesayur aser tsürabortem dang kaketshirtem junga angatetsü ajungshia liasü.

Iba sentong nung SDEO Bhandari ajanga sentong akhumdong nem SDEO Bhandari indang office building yanglushitsü aser tesayurtem anenzükdak ki ka yanglutsüsü atema mepishia züluba shiti ka agüja liasü.

## Mokokchung nung tesayurtem nem tetushi agütsüba sentong aka



Mokokchung nung tesayurtem nem tetushi agütsüba sentong temer kelen tetushi senpet agizüker tesayurtem, Mkg.DC, Mkg.SP,DEO Mkg,SDO Civil Mkg. aser AKM Tir külemi tangokba noksa.

**Mokokchung, September/ Rongjui 05(TYO):** Ao Kaketshir Mungdang-i(AKM) ayongzüka tanu Whispering Winds Hotel nung Tesayurtem Anogo nungtem nung District Teacher's Award sentong ka ayongzüka kaogo.

Tanu iba sentong nung Mokokchung nungi tesayur tajungtiba pezü shimteta District Teacher's Award angur par pezüji Wb.Lanuyanger Asst.Teacher, Queen Mary Hr.Sec.School, Wb.Temsüchizüng PGT N.I.Jamir Hr.Sec.School, Wt. Moamenla Primary Teacher Govt. Primary School Tuli "F" aser Wb.Longrimendang Graduate Teacher Govt.High School Mangmetong liasü.

Sentong nung Mokokchung Deputy Commissioner Thsuvisie Phoji-i jembidang alima balala nung nüburtem jenti nüchi kümer

alibaji tesayur ka ajanga lir,tesayurtemi taküm tenla agüja sayuba ajanga tanu asenoki tesayurtem nem tetushi agütsürta ashi.

Tesayuba mapa nung anener alirtem aser tang tesayudak alirtem ajakji alima asoshi shisa agidak taküm kaka lir,angungji tang tesayudak tesayurtemi pei sayuba Riju nungji tanurtem ts ngda nung bendang benjia mamshitsü saka kasa jenjang nung parnok dang anepalua sayutsülata adenshia aliba tesayurtem ayongzüka Mkg. DC-isa ashi.

Ao Kaketshir Mungdang-i küm shia sentong tajung ayonga Tesayurtem Anogo nung tesayurtem nem tetushi tapet agütsüba asoshi AKM nem tenüngsang agüja ashi.

Sentong nungsa District Education Officer,All Nagaland

Private School Association,Mkg. Unit Secretary tenatia shilem agia jembiba den ano District Teacher's Award agizüker tenung nung Wb.Temsüchizüng PGT N.I.Jamir Hr.Sec.School ajanga jembia, Soulhouse Academy aser Straightwat Higher Secondary School ajanga temeja ken balala aten,tarur pela agizüka AKM Tir Sb.Lanutoshi Aier-i jembia aser tepela AKM Shisaliok Zülur Sb.Lanulemba Longchar-i jembiba den sentong nung Tsüngremer leniba jazüka Sumi Baptist Church Mokokchung Asso.Pastor Youth Inazhe Assumi ajanga sarasademmer tenzüka den tatem nung Tsüngrem tenüngsang agüja UBA Youth Director Ayangba Longkumer-i sarasadema temba aser Sb.NocheLong ketdangsuba nung iba sentong agia liasü.

## DC Peren-i senzusemponger atema metetdaksür

**Dimapur, Rongjui/Sept. 05 (TYO):** Home Department Nagaland ajanga senzusempongsü atema sangdong agütsüba den lirumedema Deputy Commissioner, Pere, Hiazu Meru-ia Pimla Junction - Mhainamtsi - Jharnapani lenmang nung senzütsü atema mapang telatet metetdaksüogo.

Sangdong ajanga ashiba agi, Pimla - Mhainamtsi lenmang nung anepdang 6:00 ako nungi nikongdang 5:00 ako tashi Light Vehicles dang senzütsü

melatsü. Pimla-Mhainamtsi nungi Jharnapani leni atuba Heavy Vehicles ya nikongdang 5:00 ako nungi anepdang 12:00 ako tashi senzütsü melatsü aser Jharnapani nungi Mhainamtsi-Pimla leni aluba Heavy Vehicles ya anepdang 12:00 ako nungi 6:00 ako tashi melatsü, ta ashi.

Senzusemponger ajaki iba lenmang nung shia aliba mapang shidak nung senzütsü ayongzüker, ta Deputy Commissioner, Peren ajangasa ashi.

## Directorate of School Education-i working days atema metetdaksür

**Dimapur, Rongjui/Sept. 05 (TYO):** National Curriculum Framework for School Education (NCFSE) 2023 den lirumedema aser stakeholders ajunga den shisa agitepba sülen Department of School Education, Nagaland ajanga Department kübok lapoka aliba school ajunga (Government aser Private anaprong) nung school atema working day asoshi teinyaksü metetdaksüogo.

Sangdong ajanga ashiba agi, Foundational Stage (Classes A & B, Classes 1 & 2) aser Preparatory Stage (Classes 3 to 5) atema Honibar ajak sodi

(Holidays) alitsü. Middle (Classes 6 to 8), Secondary / Higher Secondary (Classes 9 to 12) atema ita shia 2nd aser 4th Saturdays ya sodi alitsü.

Assessments/Examinations, 10 bagless days aser danga non-academic activities/sports sentong ya Honibarnü alitsü. Item activities ya school-i mulungba mapang agitsü, ta sangdong ajanga ashi.

Iba sangdong ya tim ketdangsur nungi temelaba agir agütsür aser tang nungi tenzüka amshitsü, ta Department sangdong ajangasa ashi.



# NAGALAND HEALTH PROTECTION SOCIETY

CMHIS scheme kübok Nagaland nung government mozü kitem dang empanel asür ta tai tangatetba ka lir.

Nagaland nung CMHIS scheme kübok shirangertem melamelaa teyari ngutettsüsa government aser private mozükitem na prongla empanel süa lir.

Tang empanel süa aliba mozükitem yamai lir -

### CMHIS employee mesüra pensioner purtem atema -

- \* Nagaland nung 38 public hospitals and 25 private hospitals empanel süa lir
- \* Nagaland atener orr bendanglen Government mozü ki 03 aser Private mozü ki 62 empanel süa lir.

### CMHIS (GEN)/ PM-JAY category purtem atema -

- \* Nagaland nung Government mozü ki 45, private mozü ki 25 aser GOI mozü ki 19.

CMHIS (GEN) aser PM-JAY ajanga teyari angutsü purtem asoshi linük ajaklen PM-JAY kübok empanel süa aliba private aser government mozü ki 29,432 rongnung mashi ka nung anepalu sütettsü.

CMHIS (EP) inyakyim nung bendanglen aliba mozü kitem nung teyari shitak agütsütsü aser meshitaki inyakba mapatem nokdangtsü asoshi state government-i bendanglen aliba mozü kitem shimtetba mapang item nungdaktem ya repranger dang empanel asür :

I) Hospitals with Full NABH / JCI Quality accreditation ASER

II) Naga nunger shirangertemi sapua amongdak mozü kitem.

- \* Nagaland nung CMHIS (EP) aser CMHIS (GEN) kübok empanel süa alirtem rerpangtsü atema :

Visit <https://cmhis.nagaland.gov.in/hospitals/2>

- \* Bendanglen AB PM-JAY/CMHIS (Gen) kübok empanel süa aliba mozü kitem rerpangtsü atema :

<https://hospitals.pmjay.gov.in/Search/empnlWorkflow.htm?actionFlag=ViewRegisteredHosptlsNew>

Teyari nungdakra item helpline number mashi ka ajanga tongteprateptsü akoktsü : 8880515011, 8880515012, 8880515013, or 8880515014.



## ECI-i J&K aser Haryana assembly election indang exit poll nokdangter

New Delhi, Rongjui/September 05 (Agencies): Election Commission-i standard procedure ya benoker, ta kasa sangdong ajanga metetdaksü. Representation of the People Act, 1951 kübok Section 126A ajanga iba mapang nungji print media mesüra electronic media ajanga exit polls agia sangdongtsü memelar, ta Election Commission-isa metetdaksü.

Iba tenokdangba ya September 18 anepdang 7:00 ako nungi October 5 aonung Election Commission-isa metetdaksü.



Kolkata, September 05, 2024: Mother Teresa asüba anogomong nung Kolkata nung aliba Missionaries of Charities nung nun temi Mother Teresa nem akhüm agütsüdang tangokba noksa nung angur.

## Atangji Jammu & Kashmir-i state jenjang tanaben angutsü: Rahul Gandhi

New Delhi/Srinagar, Rongjui/September 05 (Agencies): Jammu & Kashmir assembly election atema Congress party nüboyim tenzüka party lenir Rahul Gandhi-i, election agiba sülen Centre nung Ato kilonser Narendra Modi-i aniba sorkari J&K nem state jenjang tanaben magütsütet nunga Centre nung INDIA teloktep sorkari mezüngbuba teletmetba agibaji J&K state jenjang atema asütsü, ta metetdaksü.

Jammu & Kashmir kübok Dooru assembly constituency nung election nüboyim sentong ka nung jembidang Leader of Opposition (LoP), Rahul Gandhi-i, J&K nem state jenjang tanaben agütsütsüji linük nung senso ajak külem khuret asütsüla, ta ashi.

Dooru menden nungji Congress national general secretary, G Mir-i tokteptsü. Iba menden nung pa ya Congress-NC teloktep nungi candidate lir.

“Jammu and Kashmir nem state jenjang tanaben agütsütsüji Congress party mesüra INDIA teloktep khuret dang masü saka linük senso ajak khuret asütsüla,” ta Rahul Gandhi-i ashi.

Congress-ibo election magidangyongi Jammu and Kashmir nem tanaben state jenjang agütsüdaksünüa liasü, ajisüaka BJP-ibo election agiba sülen ang agütsünar, ta

## India aser Singapore linük nati tezüngzüktep pezü agiogo



September 05, 2024 nü Singapore nung Ato kilonser, Narendra Modi aser Singapore Ato kilonser, Lawrence Wong nati AEM Holdings Ltd. semdangba mapang tangokba noksa nung angur.

New Delhi, September 05 (Agencies): India aser Singapore nati digital technologies, semiconductors, health cooperation aser skill development atema tezüngzüktep pezü agiogo, aser ibaji ajanga linük ana tsüingda amalitepa inyakba jenjang tajungba akümtsü.

Ato kilonser Narendra Modi-i Singapore semdanga Singapore Ato kilonser, Lawrence Wong den senden amenba sülen tezüngzüktep pezü agi.

Mezüngbuba tezüngzüktepji India nunger Ministry of Electronics & Information Technology aser Singapore nunger Ministry of Digital Development & Information nati digital technologies aser nung amalitepa inyaksü atema lir. Iba tezüngzüktep kübok DPI, cyber-security aser 5G ama digital technologies aser super-

Singapore nunger Ministry of Health on cooperation nati health & medicine tsütsü amalitepa inyaksü atema tezüngzüktep ka agi. Iba tezüngzüktep kübok research & innovation nung amalitepa inyaksü aser healthcare tsütsü human resource development aser pharmaceutical sectors nung amalitepa inyaksü.

Tatamsa India nunger Ministry of Skill Development & Entrepreneurship aser Singapore nunger Ministry of Education na tsüingda shisaliok aser skills development atema amalitepa inyaksü atema tezüngzüktep ka agi. Iba tezüngzüktep kübok linük anati technical shisaliok aser vocational training tsütsü amalitepa inyaksü.

Brihostibarnü Narendra Modi aser Lawrence Wong na senden amendang Modi-i, Singapore ya partner linük ka dang masü saka terenlokdak linüktem ajak ajungmesoba linük ka lir, ta ashi.

Tensa senden tembangba sülen Ministry of External Affairs (MEA) otongdar, Randhir Jaiswal-i, “Tesendaktep tsütsü mera tasen ka tenzüker: Comprehensive Strategic Partnership yangluogo. Tanü Singapore nung PM @narendramodi aser PM @LawrenceWong na senden junga menogo,” ta metetdakja liasü.

Ano India nunger Ministry of Health & Family Welfare aser



## TIR YIMYIM YIMOBILEM (EDITORIAL)

DIMAPUR ROGONÜ, SEPTEMBER (RONGJUI) 06, 2024

### Kechi sayur ?

Akhi ama, yashia linük ajaklen school tesayurtem nem akhüm agüja tesayurtem anogo mungogo. Atangji, ibai tesayurtem nem akhüm aser tenüngsang agütsüba anogo saka ano külenbo tesayurtem nem pei khuret rajema angatetdaksüba anogo tongtibang ka lir. Aji oda, yimten yimsüsürtemi anir kaketshirtemi tesayurtem nem tenüngsang agütsüba anogo nung tesayur shia mulungjang nung "nia kechi sayur" ta peisasa asüngdanga telangzüba bushitsübaji kanga tongtibang kümogo. Atangji, tesayur shiai pei pei class takdang nung tanurtem dang sayuba subject kaka lir, itemjibo tangari tesayutsü renemer agütsüba sentongtem lir, anungji ajibosa jungjunga bushisemer sayutsüla. Ajisüaka, tesayur ka asoshi tanurtem dang peii sayuba subject nung aketba lesson-tem sayuba kisüngji tongtibang masü saka kaket nung aliba lesson-tem dang nungi alia oagi kaketshirtem shia pei taküm aser tanela chiyongtsü angutsüba lenmangtem dena sayutsübaji, ano, tanüsa tongtibangba kümogo. Aji oda, tesayurtem ya tanurtem nem shisaliok (education) agütsürtem asünungji, tanur shia dak Tsüngremi agütsüba shisa tenük lapokja alima tebilemtsü aser temoatsütem ngudaktsütsüba mapaji tesayurtem mapa lir. Shisaliok sayuba aser angazükba nükjidong ya mapa ka bushia ita sen agi tebok mesüa alima nung khen monger aotsü kisüng atema masü saka alima nung nisungtem tebilemtsü kokteta parnok nungdak bushiteta mesüra yangluteta agütsütsü asoshi lir. Tetezü, shisaliok sayuba aser bushiba ya alima nung nisunger nungdak agütsütsü asoshi tashi aser tasa bushiba sentong ka lir. Ibaji angateta tesayurtemi kodang tanurtem dang sayudir, pei sayuba subject nung aketba lesson-tem dang nungibo ano shisa tasenba aser tuluba bushiloka sayutsü asoshi tejangraba adoktsü. Idangjibo, tesayurtemi sodia maginütsü aser peii bushitetba shisatsü aser tangatetba kaketshirtem den lemsateptsü asoshi anepdang shia yongyaa atatsü. Aji oda, kodang tesayurtemi pei sayuba nükjidong angateta sayutsü tenzükdir, pei melen tangar yoksubajibo otsü maka, school-ji par ki akümtsü aser pai mesüra lai sayuba class takdangji pa meyong takdang amato kümadoktsü. Tanü asen lima yimten aser lokti aser arogo nung dena temelenshi tajung bener arutsü nungdaker. Itemji taintem majungba ajanga lokti menentsüba mapatem lir. Item tain rogotem ya kar sayu mangaba purtem aser kar mesayuba purtem, anungji asen yimten, lokti aser arogo nung nungdakba temelenshi ya parnokibo bener marutettsü. Parnok atema teinyaktsü aser temerangdangtsü ajak agi tang dang nungi tamajungba aser ochimashiba makümtsübaji dang lir. Aji asünung, tang asen yimten, lokti aser arogo majungba melenshitsüba yabo tanü class takdang nung tesayurtemi sayuba tanurtem ajanga dang melenshitettsü. Aji oda, tanü asen lima nung kaketshirtem dang sayutsü rongdak nungdakji, asenok asoshibo ita petinui atutsüba ya tama masü saka asen kidang aser asen lokti nung ochishia inyaktsü aser alitsü sayutettsübajiang tongtibangba kümogo. Iba shisatsü jagi ochishia yimten, lokti aser arogo tenzüker adoktsü, anungji lenmanga, apua aser kiojena shitak yanglutettsü, light-a agishia arutsü aser nisung shia nem Tsüngremi lemzütsüba sempet amshia pei lima, pei lokti aser pei arogo takar kümaktsütsü. Ibaji ataloktsüsa sayutsübaji tanü asenok kaketreju shia nung tesayur shia teinyaktsü khuret aser maongka asütsü. Item tatalokba tajungtemji tanü tesayurtemi sayuba kaketshirtemi atalokdakja asangsang nung angutsübaji tesayur ka asoshi tepela aser jangratem tulutiba mapang ka asütsü. Ibajibo, atangji, kasa tesayurtem asoshia tanü 'Tesayurtem anogo' amungba dang nungi sentsütwangshiba anogo asütsü. Item tarutsü anogo tajungtemji yimdangi arua, anogo shia kaketshirtem den shisalen tasen bushiloka amongtsübaji, tesayurtem asoshi anogotem süitema aoa memetet, jangratemtsü anogotem lir.

## OLEMSABANG

### NÜBORTEM ANÜNGER, YAMAI RAKSATET NO!

- Mrs. R.Mapukala Pongen, Merangmen (Tsürangkong)

Angangni...Naga nunger,ali poker matalokdangba otsüsütsü.  
Tamapur tsüngnep shilua mereprangdangba kin,  
Asen tzürapur zülupanglu memetetba putu nungbo,  
Temeyong ter agi inyakteta kika sü chia aru.  
Tanü ama kolem kiraka ashikelaka mechiyong.  
Au ! Nokenketer tenüng aginüyong, Bendang semer ateta tekolakbo alep.  
Ajaki angudak mangkoterong nung ayu, par tarutsü naroküm asoshi.  
Parnokibo mauya, teyazü mejembi, ashikelaka pei agitsü mepushi.  
Lijaba tsüngrem tsübu agi mapa ajak ashiakanga lia aru.

Yimden yimsüsüba ren, kin kidong tabensa,  
Ashi auer, abet-asong-er,melempoyim lembur magi.  
Tzüzüng ozüng akangalonga,takar,tulur mesükshi ochi nung,  
Tzua meseni akümket-keta yimsü süa aru.  
Aben jagi alimaji yimjiyimjong nung nübor tem pelatep.  
Temeli ana maten,yangko semer mawazü,yazü nung obang majem.  
Onsara teindang, shinga rongsen nunga mamoshi.  
Chirnor, semchisemnör asoshi atakatem ngua lir ta.  
Aya...Tanü tasenba putui-bo Tsüngrem metsübur no!!!

HAI...Chuba menden nung amenertem,yimsüsür, Rev.Pastor, Tenzükertem,  
Na-a Naga nunger südi ? Otzü,Obou nunger ayak kodaser samatsür.  
Yimsüsürtem,Azü-i shi achitsü raktepa ata ama,  
Government nungi aruba yim daklir sen rakzüksü atateper.  
Ochi jembirbo nai tebang nembangtsür, sensaker temeden maka.  
Ozüng amertem yazü nung obang ajem, aya...ochi pukümer mali.  
Küyi tajemtsü maka medem, tang kü mapang, kü molung,ulura...  
Nü yimsüsüba mapangjia künübo süitemtsü atakatem tsübuangni..

Government nungi angati jang sensakertem asoshi maongka.  
Iba temoatsü nung yimsüsürtemi shidak ketdang südar ma?  
Timtemer nem agütsüba jang takar,yimsüsür kidang bag..bag.  
Nübor nembo tatakzük shidak nunga terara ajemtsür.  
Government-ia jang abenba gari para agütsülasang jungla.  
Hindu,muslim lima nungbo India temzüng shidak.  
"Nagaland For Christ" limabo "kü molung" " onok molung"  
Alima ya mopung putu nung alir, ajak angur, angashir.  
Shir lenir-i sensaker auso nungi rakzüktir, asaktsü.  
Minister,MLA tem,tulur, tilar ajak votebo kesa dang.  
Election nung nai nangzükba ola tobo jangratemtsüka.  
Mapabo mali, tazüngla , post kar atokra nür kinünger, nü "Right hand"  
Sanction kar arura takar, tulur, sentsüketer asoshi dang.  
Süra sensaker, mokokmeiner asoshi koda!  
Tarutsü nung jenjang jungnura,ajak dang kasa meimang.  
Küm pongu tsüngda nübori nü tejak amatsüsa na teli.  
Na aser nür kinunger asoshi dang tepilem, nübor asoshia inyakang.  
Iba jagiang tarutsü takokji nü meyong asütsü.

O..Hi..Rev. Pastor, Tsüngrem o tera soa zünga meteterem,  
Tsüngrem asen den melitetyong Pa melen nenok shimteter ayu.  
Nü mapa yabo temoatsü,mesüra atakatem.  
Tuluba nungi ayanger tashi asentsü sena aazükba rongsen,  
Ter shilem agi na aser nür kibong mesür.  
Saka tanü Tsüngrem lartem, nenok mapa yabo tajung masü ato!  
Pulpit nungibo Kodak tenyar ola ama, telongbo tsünü.  
Tsüngen tetzü o techanu otzü ama, santem ya koloni aotsü?  
Laishirtem ! Nenok tama yanglushiang,mapa maden tamang tasü.

O tempang ya dang. ABAM aser Arogotem inyakyim reprangdangra,  
Tasen putu nung purapuji onsara, tesüngmangtsü tetamatsü.  
Envelopbo zünger mezüngma, Tsüngrem o sayua kiboksembo mali.  
Laishiba o bo temezüng nung janga lir, tang kodaki taor ama.  
Tsüngrem tenzüker ki Minister ki ama,ita senbo scale tajung.  
Talila tagütsütsü tim ajak Arogoi agütsür.  
Chiyongtsü, aonsotsü tajung ajak nübori na tama bilemteter.  
Tsüngrem tenzükbaji Minister ka ama tepilem ma no...  
Yisui ashiba to, ni tenzükdaktsü masü, tenzüksü aru pilemtetang.

"Yimtsüng nung nübori aibelenra senchi ak tuluba"  
Nübor asoshi teyari aruba nungi "PERCENT" agi yonga kichia masü.  
Arogo nunga nisung kari aibelen, Tangsa Arogo nungi intoktsü.  
Tenzükba wadang nung kari aibelenaka "Kichia masü"  
"Ya tepilemdangtsü tulu!"  
NÜBORTEMBO ANÜNGER! YAMAI RAKSATET NO?

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# Baptist Health-i NLR Rose City nung clinic tasen ka semzükogo



September 4, 2024 nü Baptist Health Family Clinic semzükdang tangokba noksa nung angur.

**September 05, 2024:** September 04, 2024 nü Baptist Health-i NLR Rose City nung Baptist Health Family Clinic ka semzükogo; iba clinic ajanga North Little Rock nung alirtem aika tajangzük angutsü, ta Baptist Health ketdangsertemi metetdaksü.

City of North Little Rock aser Baptist Health nati longiemer lapokba Baptist Health Family Clinic-Rose City ya 2013 küm sülenbo tang mezüing full-service medical clinic ka asütsü, kechiyong 2013 küm North Little Rock nung aliba medical office mi agi rondoka liasü.

Baptist Health ya Yisu Khrista tanela ajanga anidaksüba Khristan organization ka lir.

6,500 sq. feet nung amenokba clinic ya 4200 E. Washington Avenue, North Little Rock nung lir.

Baptist Health CEO, Troy

Wells-i, "Baptist Health indang mission tejakleni oa Khristan temeim ajanga medical services tajungtiba agütsür. Iba clinic lapokba ajanga Rose City nung alirtem temang anepalubaren jenjang ajungketsü aser teyari angutsü onoki imlar," ta metetdaksü.

North Little Rock nung Mayor, Terry Hartwick-i, "Baptist Health-i maneni health care services tajungba agütsür aser yimti nung alirtem atema iba health clinic lapoktsü atema parnoki asen yimti den longjemba atema onok pelar," ta metetdaksü.

"North Little Rock anüdoklen tsütsü nütsüing kanga renloker. Yimti nung factory tasen asem lir, ki tasen aika süogo aser yimti ainba mapang nung iba clinic lapokba atema onok pelar. North Little Rock nung tesem tajung ka nung iba clinic amenokogo," ta paisa metetdaksü.

MD, Jessica Udeogu-i Baptist Health Family Clinic-Rose City nung shirangertem anepalutsü. Dr. Udeogu ya Carrollton, Texas nungi lir. La Baptist Health-University of Arkansas nung Medical Sciences Medical Education Program renema liasü.

Dr. Udeogu-i Walden University, Minneapolis, Minnesota nung Healthcare Administration nung Master's degree angu aser Arnos Vale, St. Vincent nung aliba St. James School of Medicine nung Doctor of Medicine renema liasü.

Iba clinic nung Gia Williams-a inyaksü. Marked Tree, Arkansas nungi Williams-i Arkansas State University nung Master of Science in Nursing degree angu aser Pittsburgh, Pennsylvania nung aliba Chatham University nung Doctor of Nursing Practice renema liasü.

# Northern Ireland nung nisung kari Tenla ki ka rongdoktsüogo

**September 05, 2024:** Amongnü (September 1, 2024) Northern Ireland kübok Country Antrim nung nisung kari Tenla ki ka rongdoktsüba sülen police-i iba tatalokba bushisügang tangzükogo.

Hombar nikongdang-a Church of Ireland Tenla kidang nungjagi maneni mokozi adoka anguba sülen fire service tanaben jaa liasü.

Green Island nung aliba Church of the Holy Name Tenla kidang züngsemtemi Arogo küm 70 ajungbamong amongba sülen ghonda ishika tsüingda Tenla kidangji mi adoka liasü.

Mi ajanga Tenla ki tongti

aser hall kanga mejungi arong, ajisüaka iba tatalokba nung shinga meyiru.

Arogo küm 70 ajungbamong sentong nungji Bishop of Connor, Rev. George Davison-a densema liasü.

Facebook post ka ajanga Rev. George-i, "Holy Name Arogo taküm lir. Iba ama tayongzükba ajuruba mapang nung Arogo tashi itta lir aser tasü itta lir. Arogoi maneni Greenisland nung alirtem meimer aser anepalur; Yisu kabu nung Arogo kümzuka lir; Pai taküm agütsür," ta metetdaksü.

Hombar nikongdang Bishop George-i, "Arogoji mi agi

arongba building ji masü saka Tsüingrem meimertem aser nüburtem meimertem telok ka lir," ta metetdaksü.

Arogo lenirtemi Tenla ki rongdoktsürtem dang odiodia aibelen nangzükang, ta ayongzükogo. Tenla ki süshitsü atema pound sen 10,000 bendentsü nükjidong nung GoFundMe page ka tangzükogo aser tang tashi nung tenla pound sen 6,000 dak tali bendenogo.

Fundraiser organiser, Avril Hawthorne-i, mi agi Tenla ki rongdokba sülen yimti nung alirtemi maneni nungita yariba ngua Arogoi kanga pelar, ta metetdaksü.



September 5, 2024 nü Ghotovi Village Baptist Church (GVBC)-i Niuland – Ghotovi – Zhadima – Kohima lenmang nung ainlen senzürtem dang temeim sayua tzü bottle den chiyungtsü lema agütsüdang tangokba noksa nung angur. Anentsüh ajanga Kohima – Dimapur NH-29 lenmang mokdangba sülen Ghotovi – Zhadima lenmang nung gari tila aser passenger garitem senzüdaksüba mapang nung Arogo-i temeim mapa inyaker.

# ANOGO ABEN TSÜNGREM DEN

## Tsüingrem tenla ki

*"Nenek Tsüingrem tenla ki, aser Tsüingrem Tanela nenok dak alir ta nenoki memetet no?"*

(1 Kor. 3: 16).

Tsüingrem tenla ki nung Pa alir, saka I Kor 3: 16 yagi meimchirji Tsüingrem tenla ki lir ta ashir. Süra Paji asenok taküm nung teti dena lir ta iba lai ajanga angatetdaksür. Mapang ajak nung temeshi Tsüingrem aliba tenla kidangji temeshi mapa dang inyaker, kechiaser ibaji temeshi mapa inyaksü asoshi yangluba tesem ka lir. Süra asenok meimchir takümji Tsüingrem tenla ki ta ashir sürabang asenok temang, tekolok aser shisatsü ajak jagi kechi mapa inyaksüla aser koba amala mapatembo meinyaksüla ?

Asenok taküm nung Pa tanela temeshiji mapang ajak nung lir ta asenoki metettsüla. Tsüingremi asenok taküm ya Pa asoshi temeshi tenla ki ka ama asüngteta aser merükteta lidaktsüner. Asen taküm nung temenen chuba süa parnok nem manishidaktsüner, ibaji teyanglur Tsüingremi asenok nungi taginüba.

Tsüingrem tenla ki koda temeshi lir, yamaji asen taküm ya azüoka meshiteta alitsü iba lai yagi angatetdaksür. Shibaibo tanela temeshi anioka yur temenen mapa inyaktettsü ? Anungji asenok taküm meshiteta liang aser yangji Tsüingrem chuba südakjang ta iba lai yagi tesayuba agütsür.

# Baptist communicator, Floyd Craig alima nungi pilaogo



**September 05, 2024:** Mapang talangka Baptist communicator, Floyd Craig August 30, 2024 nü alima nungi pilaogo; pa arrshi küm 91 liasü.

Oklahoma nungi Floyd Craig aser pa kinüngtsü, Anne nati 1981 küm Craig Communications tenteta liasü aser 'client' tem rongnung Southern Baptist organization-a aika liasü.

Tamalen Craig ya Baptist General Convention of Oklahoma nung director of communications aser Southern Baptist Christian Life Communications (tangbo Ethics & Religious Liberty Commission) nunga Communications Director inyaka liasü.

1990 küm Southern Baptist Convention Executive Committee-i Baptist Press editors- Dan Martin aser Al Shackelford na mapa nungi anentsüba mapang nung Craig densema Southern Baptists aser Baptist state paper editors aikati Associated Baptist Press tenteta liasü. Tangbo Baptist News Global ta ajar.

Baptist & Reflector nung editor, Lonnie Wilkey-i, "Floyd ya kü medemer ka liasü. Talisa ni Baptist communications nung inyakba mapang nungi pa ya kü medemer tajung ka liasü. Baptist & Reflector nung ni editor shimba sülen pai ni kanga yariogo. Pai mapang ajak nung ni yaria liasü," ta metetdaksü.

"Craig-i Communications, marketing aser crisis management dak sendakba nung kaket 10 zülüogo. Floyd ya atangji Baptist communications nung mongin ka liasü. Pa dak asayamenü sempet liasü. Pa meteta alirtem ajaki pa kanga menungratsü," ta Wilkey-isa metetdaksü.

Macon, Georgia nung aliba Mercer University nung tongti aser Marketing Communications nung tatong Tir Larry Brumley-i, "Craig ya ajungmesor ka liasü aser pai akümüli piyong nisung aika yariogo," ta metetdaksü.

September 1 nü Baptist News Global indang olemsabang ajanga Larry-i, "Linük tesem ajaklen Floyd Craig-i anitetba lenirtem aika lir. Pa ajanga nisung aika taküm nung kongshiego aser kü taküm nunga pa ya kanga tongibang nisung ka liasü; iba atemaji ni pelar," ta metetdaksü.

Craig-i pa kinüngtsü, Anne Craig den chirnur ana, semchirtem aser tanaben semchir aika toktsür pilaogo.

AO OSHI ANGAZÜKDAK:

TANÜ ANGAZÜKTSÜBA OJANG



Tamendak

(n) amentsüba tesem (seat)

\* Onok lokti sendeni aodang tamendak yuja liasü.

Tamentakdak

(n) o mesüra oset ayudak, ajemetdak ( base, theme)

\* Tzü ayuba tank tamentakdak majungba agi raksa.

Asenok lokti tamentakdakji telongjem asütsüla.

OLONG PAITEP # 6916

Grid for OLONG PAITEP # 6916 with numbers 1-24 in a 5x5 layout.

TIPIEN

- 1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tububa - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. \_\_\_ tatsü - (3)
12. Tebur kidong aser zünga kasa tsüingdajatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6915 TELANGZÜBA

TIPIEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüingdak, 10. Yongya, 11. Kongro, 13. Ora, 14. Ata.



MINISTER ALOKBA ASER PUBLIC NA SENSAK ASEMER

Public : Ministerba, küm ana tejaklen lenmang renemtsütsü nangzükbatu, lenmang merenemdang ajak raksaoko. Kolen nungi jang-o-nü bener arutsü.

Minister Alokba: Aya, shisatebulu. Chopper aser tayimtsü tulu ajanga bener arutsütsü.

Public : Kari lenmang meyaglütet nung, tayimtsü ajanga bener arutsübo meyimlar no.

Minister Alokba: Odang amangang. Sorkari kechi inyakner ajak akoktsü tashi tulu lir.

Public : Nenok Minister aser MLA tem ya tepang lu dang ayimer. Mapa küma inyakba kecha mali. Tamangtsü mali.

Minister Alokba: Aya, nenok amai tsük lu ayimtsü masüjito. Onok mapa aser alu agi ojang.

Public : Oh, Alokba! Asen limabo yakta bo jungtir!

Lilir : WhatsApp

Ruopfuzhano Whiso-i Miss Universe India nung shilem agitsü



Kohima, September 5, 2024 (TYO): Miss Universe India nung Nagaland tenüing nungi Ruopfuzhano Whiso-i tokteptsü.

Tanü Beauty and Aesthetic Society of Nagaland (BASN) president Mele Pucho aser BASN information and publicity secretary Sarah Nam nati osangbener den jembidang iba osang metetdaksü.

BASN-i July 2, 2024 nü Zone Niathu Chumukedima nung open audition ka agi aser tetokteper 19 rongnungi Whiso

shimtet ta Sarah-i ashi.

Miss Universe Nagaland India Whiso ya Miss Nagaland 2017 nung first runner up adok aser Miss Kohima 2017 liasü.

La ya model, entrepreneur aser host ka lir aser lai Regional, National o international shows nung host inyakogo.

"September 22 nü Jaipur nung Miss Universe India tetokteperba alitsü aser Whiso September 9 nü apusoa aotsü. Lai state atema konang bentsür arutsü amanger" ta Pucho-i ashi.

Whiso-ia Nagaland state tenüing nung shilem agitsü maongka anguba atema pelaba metetdaksü aser nisung ajak dang teyari meshiogo.

Lai state costume asemtsü aser Nagaland indang tamaittsü sayutsü ta Whiso-isa ashi.

"BASN-i küm 33 tashi arudang tang mezüing atema Miss Universe India tetokteperba nung shilem agitsü atema tetsür ka yoker. Tarutsü anogotem onoki maneni sabang balala agütsütsü" ta Pucho-i metetdaksü.

Nongshum nungeri police outpost nung central forces magizüker

Imphal, September 5, 2024

(Agencies): Imphal East kübok Nongshum yimdaklirtemi state sorkar anema lungkak aitogo. Nongshum nung tang yangluba police outpost nung central security forces mapa lemzüktsütsü lemtet anema parnoki iba sentong agi.

Ibudhou Nongda Lairen Pakhangngba Community Hall nung parnoki lungkak aitba sentong agia liasü.

Nongshum ya Meitei nunger yimtsüing ka lir aser parnok meketa Kangpokpi district

kübok Kuki-Zo yimtsüing 9 lir.

"Tang tasen yangluba police outpost nung state forces mapa lemzüktsütsü onoki akhanger" ta Nongshum Development Committee General Secretary Yumlembam-i ashi.

Parnok den arrtsüa aliba district nung Assam Rifles mapa lemzükja aliba dak parnoki temulung malemer. Kuki-Zo nungeri yimtsüingtem amakdang AR-i mapa meinyak ta parnoki tai tongloktür.

"Koutruk aser temeket aliba yimtsüingtem nung drone amshia bomb pokloktüdang

Meitei tsür ka asü aser nisung 11 yirua lir. Meta talang pilar aliba yimtsüingtem nung alirtem tetsübu tia nung alir" ta Yumlembam-isa ashi.

Külen, Assam Rifles-i Meitei aluyimertem Kuki yimtsüingtem anasa lendenlen aliba alui meyoker ta paisa ashi.

Kuki telungpurtemi prangpong bener aonung onok yimtsüingtem anasa arur ta Yumlembam-isa ashi.

May 2023 nung kin o kin tsüingda rara adokdang Nongshum nunger 40% shi ka pei talidak toktsür jena ao.

JAC-i drone ajanga tepsetba tasü mang agizüktsü memulunger

Imphal, September 5, 2024

(Agencies): Manipur nung Joint Action Committee (JAC) kati drone amshia amakdang tepsetba tetsür tasü mang agizüktsü memulunger.

JAC-i akhangba onüktem Chief Minister-i agizükaka parnoki Ngangbam Surbala mang meshizüktsü memulunger. JAC-i tamasa nangzükba ama mapa inyaktsü akhanger.

Bodbar nü Chief Minister N Biren Singh aser JAC senden ka amen. Idangji JAC convenor Ningthoujam Popilal-i takhangba onük 8 agütsü.

Deobarnü Koutruk amakba kiralongrartem anema bushisüingdangtsü aser parnok ajak aputsüla ta JAC-i takhangba agütsü.

Parnokisa Kuki telungpur telok ajak den Centre-i Suspension of Operation (SoO) meyipa agitsü aser Koutruk den iba anasa aliba Meitei nunger yimtsüingtem nungi Assam Rifles agientsü takhangba agütsü.



Tenemtsüinglen aliba Meitei yimtsüingtem aser lendong atalokba tesemtem nung state forces peria mapa lemzüktsütsü aser sorkari tasür kibong reprangtsü atema JAC-isa takhangba agütsüogo.

Iba dak sendakba nung CM Biren-i JAC dang post-mortem examination agiba sülen tasü mang agizüktsü ashi.


Ajisüaka JAC-i Chief Minister ajanga nangzükbatem asangsang nung matalok tashi

tasü mang magizüktsü ta metetdaksüogo.

"Koutruk nung Kuki telungpurtemi tepsetba Ngangbam Surbala Devi atema tentetba Joint Action Committee (JAC) züingsemtem den senden ka menogo" ta Biren Singh-i metetdakja liasü.

"Parnok temulung raksaba aser mepelaba angateta lir aser sorkari item onüktem asoshi mapa inyaktsü nangzükter" ta pai ashi.

# China Tir Xi-i Africa atema mapa million ka agütsütsü nangzük



**Beijing, Rongjui/Sept. 05 (Agencies):** Global South atema Beijing-i külemi terenlok mapa inyaksü lenmang bushiba mapang China Tir Xi Jinping-i Africa nung mapa million ka agütsütsü nangzük.

Brehostibarnü Forum on China-Africa Cooperation nung jembidang, Beijing-i African linüktem nem ‘financing’ tasenba nung loans densema sen \$51 billion agütsütsü aser teyari balala agütsütsü aser continent ajunga nung tesendaktep tajungba akumtsü atema kisü-jensüba projects 30 yaritsü, ta Xi-i ashi.

“Asenok külemi lenmang, railways, schools, mozüki, industrial parks aser special economic zones yangluogo. Item project yagi nisung aika takum aser tia melentsü,” ta Xi-i Beijing semdangba African lenirtem dang ashi.

China aser Africa nunger külemi inyakba ajanga jenjang tasen aser tuluba tongtetsü aser Global South indang “modernisation” animesotsü, ta pai ashi.

United States densema Western linüktem den rongsenketzung aser yimtenren tsütsü tesendaktep mejungi

akumba ajanga Beijing-i Africa nung tenük yokba mapang ka nung Xi-i iba o ya jembi.

Ki o jen tsütsü mapang talangka timtem ajurua aser nütsüng yongsük ajemba densema tayongzükba balala ajanga alima nung second-largest economy ajema akumdang Beijing-i iba sentong ya tenzüker.


Shishilempaba tsütsü China ya Africa atema trade partner tulutiba lir, aser iba continent nungi adokba talisa minerals, toztü aser yinsang-yinre quarters ka jungnüa iba Asia linük yagi arur.

Beijing ya continent nung sen timtiba aputsür linük lir, aser parnoki 2006 aser 2021 tsüngta Africa nem sen \$191 billion aputsütsü nangzuka liasü.

Asemnü senden tenzükba mapang African lenir temi infrastructure, agriculture, mining aser energy amala nung teka amteper inyaksü asoshi tezüngzüktep balala agiba sangdonga liasü.

Item rongnung Kenya Tir William Ruto-i linük yimtiba Nairobi aser Mombasa tsüngta railway ulushitsü aser East African linük anüolen highway ka tuluba kuma yanglutsü atema teka amteper inyaksü sangdonga liasü.

# India, China & Brazil tetsüngtai ia Russia-Ukraine indang jembitetsü: Putin



**Moscow, Rongjui/Sept. 05 (Agencies):** Ukraine dak sendakba nung yimjung ken o jembitsü asoshi China, India aser Brazil ya mediators ama inyaktetsü, ta Russia Tir Vladimir Putin-i Brehostibarnü ashi.

Rara tetenzüklen Istanbul nung Russian aser Ukrainian negotiators tsüngta jembishinü akadang preliminary agreement ka züngzükteper mapa kuma mamshi aliba nungya ajemdaker jembishinütsü akok, ta Putin-i ashi.

Kyiv-i Kursk region telung nung amakdang Putin-i yimjung ken o jembitsü magizüki liasü,

saka tangbo pai Ukraine den jembishinü akatsü renema lir ta ashi.

Ato Kilonser Narendra Modi-i Moscow semdangba sülen tawa Ukraine semdanga Russia aser Ukraine tsüngta tang teraradak aliba nung India tangatetba nenshia ashiba den India teti yimjung tsütsü adener ta shir mapang tatsüka lir Putin nungi iba o ya angashir.

Ukraine-i ajungbena August ita Russia indang arütsü alema oa Kursk region maka sepai meyirijang aika arütsü alema oa yimtsüng aika rakzük. Iba mapang Putin-i yimjung ken o mejembitsü ta shia liasü.

Vladivostok yimti nung

Eastern Economic Forum alidang tasüngdangba langzüba sentong ka nung jembidang, jembishinü atema Russia renema lir, ta Putin-i ashi saka 2022 küm Istanbul nung Moscow aser Kyiv indang negotiators temi tsüngta tezüngzüktep ka yanglur mapa kuma meinyak aliba nung ajemdaksüla, ta ashi.

“Parnok den jembishinütsü atema asenok renema lir asü? Asenoki yamaji inyaksü kodanga memulungi mali, saka mapang tatsüka atema akhangba nung ajemdaker masü, saka Istanbul nung mulungtepba nung ajemdaker asütsüla,” ta Putin-i ashi.

Moscow-i Ukraine amak tenzüker mapang tatsüka lir Russia aser Ukraine tsüngta tezüngzüktep ka yanglutsü anasai aor, ta Kremlin-i 2022 küm tetenzüklen shia liasü.

“Asenoki agreement ka yanglu aser yangji ajak lir. Ukrainian delegation tekolak-i meyongnem agütsüba ajanga iba document kuli sütsür, tetetzü Ukraine tsütsü iba agreement yagi temulung süa liasü,” ta Putin-i ashi.

“Meinyaktsü totuyuba agütsüba ajanga iba agreement mapa kuma meinyak, kechiaser United States, Europe – Europe linük kari – Russia madak takok ngunü,” ta Putin-isa ashi.

# KHONANG TETUSHI AGÜTSÜR



Government High School Mangmetong Staff aser kaketshirtem ajaki Shri. Longrimendang (G/T), pai 5th September, 2024 tesayurtem anogo nung District Teachers award khonang tajung ngutetba asoshi tenüngsang agütsür.

Tsüngremi maneni pa sempet aser mapa tajung shisawadang nung temoatsü aser takok lidakjang ta kakat riju sanger tamang sarasadem.

# MULUNGNEN O



ASO:  
11.11.1934

ASÜ:  
02.09.2024

Onoki teti meima aliba obala **Takoyongdang Lemtur** asüadang nübu, rongsen aser sarasadem agi ozü den yaritepba tembartem, kinunger kija shia dang pelaba lemsateper. Ano talisa Dr. B. Abenla Jamir, Family Medical, Naga Gaon aser Faith Hospital nungi Dr. Akümnaro, Nurses aser care-givers temi ozü kanga anepaluba atema pelaba shisemer. Meyipa onoki nenok nem kecha magütsütetsü, saka Tsüngremi nenok ajak mulamushia moajang ta ozü sarasadem.

~ Temeim Kinungertem.

# Venezuela nung October 1 nü Christmas amungtsü sangdong

**Caracas, Rongjui/Sept. 05 (Agencies):** Presidential election nung ochimashi mapa inyakogo ta opposition temi tai tongloktsüba sülen Venezuela Tir Nicolas Maduro-i taküm Christmas ya October 1 nü amungtsü sangdongogo.

July 28 nü election agiba results atema opposition aser linük balalai ola adokaka arishi küm 61 tain Maduro ya küm trok kümsük tasembuba tir inyaksü lir.

“Nenok dang pelaba temaitsü aser akhum agüja Christmas anogo atsüzüka October 1 nü amungtsü ni totuyuba agütsütsü,” ta Maduro-i Hombarnü television sentong ka nung ashi.

2013 küm Hugo Chavez nungi yimsüsüba menden melenzükba sülen Maduro-i Catholic nunger timba aliba linük nung Christmas anogo melenshiba ya tang mezüngbuba masü.

Saka tan ya opposition temi taküm election nung shidakba takok nguogo ta ashiba ajanga nüburtem jashitepa aliba mulung süngzüktsütsü mechi mera agiba amai ajiteter.

United States aser Latin

American linük aikati Venezuelan opposition bhukuma nokdaker, aser Maduro den tesendaktep tajung aliba Mexico, Colombia aser Brazil linük temi ozüng azüngba tejangja mongui official results agizüktsü memulunger.

Hackers temi data raksatsüba mechi election indang record ya mesayutetsü ta elections agency ajanga ashir, ajisüaka observer temi yamaji inyakba kuli mali ta ashir.

Opposition candidate Edmundo Gonzalez Urrutia-i election nung takok nguogo ta tekong meranga nokdakba yong prosecutors temi pa aputsü totuyuba agüja lir aser pa jenshia senzür.

“Tasümaim Edmundo Gonzalez Urrutia-i merangba ama ama iba linük nung nisung shinga ozüng, institutions dang temaba mali,” ta Maduro-i ashi.

Maduro-i takok nguogo ta sandongba sülen longkak aitba mapang civilian 25 aser sepai ana süogo, nisung 200 jungnüa yiru aser 2,400 dak tema tepuokdak yua lir.

## Taküm Ballon d'Or nominee nung Messi aser Ronaldo mali

**Paris, Rongjui/Sept. 05 (Agencies):** 2003 küm nung tang mezüngbuba tebur indang Ballon d'Or award atema nominee nung Cristiano Ronaldo mesüra Lionel Messi dena mali, kong football asayar tenüng 30 jatetba nung England nung Jude Bellingham dena lir.

Portugal nung iba sempet ponguben tashi ngua alisang football asayar mongin Ronaldo ta taoba küm nomination nunga meliasü, aser 2023 küm otsü yanglua iba award tiben buba angusang aser 16 ben nominate süa alisang messi ya taküm Argentina-i Copa America takok marok ngutetaka maden.

Euro 2024 asayamung akoker Spain nungi asayar trok iba award atema nominate süa lir, aser parnokji arishi küm 17 tain Barcelona winger Lamine Yamal den Nico Williams, Alejandro Grimaldo, Dani Olmo, Rodri aser Dani Carvajal shibai Real Madrid nungi Champions League akok.

Real Madrid nungi asayar

tenet nominate süa lir aser yangji tawa Paris St Germain nungi arudang Kylian Mbappe den Bellingham aser Brazil nungi Vinicius Junior lir.

Euro 2024 nung runners-up. England nungi Bellingham den ano nominee pongu lir aser parnokji Harry Kane, Bukayo Saka, Declan Rice, Cole Palmer aser Phil Foden alitsü.

European Championship nung player of the tournament angusang Rodri-i par team nungi asayatem rongnung kati Ballon d'Or angutsü langa lir ta ashi.

Iba sempet ya Spanish league nung asayar temi dang amokbanger aruaka 1960 nung Barcelona nungi Luis Suarez-i anguba dak alaka Spain nung shingaia aliba nung asayar tajungtiba sempet ya ngua mali.

Germany nung Spain-i European Championship nung kanga junga asayateta asaya tenetprong nung takok anguba dang masü parnokji gial 15 agütsütet, koba Euros nung team kati goal agütsüba timtiba

alitsü.

“Spanish football-i Ballon d'Or winner ka langa lir. Ni ochishia ashir, Spain nung ka nem kokdaksüner, shiba südir kecha masü,” ta Manchester City nungi asayasang Rodri-i Euro 2024 final asayaba sülen ashi.

Pai iba sempet angutsüba atema teimla ali-mali ta asüngdang dang, “Champions League akoker Real Madrid nungi Dani Carvajal-ia langa lir ta angazükogo. Ni inyaktetba nung ni temulung süa lir. Saka nisung kari asadangtsüla,” ta Rodri-i langzü.

Tetsür indang Ballon d'Or Feminin nung Champions League winners Barcelona nungi asayar trok nominate süa lir aser parnok rongnung taoba küm takok angula Aitana Bonmati aser iba sempet anaben nguteta alila Alexia Putellas dena lir.

2024 Ballon d'Or awards agütsüba sentong ya October 28 nü Paris nung alitsü, kong alima nung asayar tajungtiba shimtsü.

## KDVA pur 19 buba Foundation Day mungogo

**Kohima, Rongjui/Sept. 05 (TYO):** Kohima District Volleyball Association (KDVA) pur 19 buba Foundation Day sentong September 3, 2024 nü Kruzo Park, Tsiese Basa nung agia liasü.

Iba anogomung nungtem nung exhibition match (Volleyball & Futsal) asaya aser lokti chiyongba mapang liasü.

Iba sentong ya KDVA joint secretary Savilie Kire lenisüba

kübok agi aser KDVA vice president Mhalelhou Mere ajanga salem o shia liasü.

Maneni KDVA property secretary Keneiwhelie Merhieso-i melepzüng o jemba liasü.

Kasa mapang 11th Kohima Open Volleyball Tournament 2024 (Men & Women) ya “Transcending through Sports” omen kübok October 15-19, 2024 anogotem agitsü sentong lir ta sangdong ka ajanga ashi.

## US Open 2024: Pegula-i Swiatek tsükdakja semi-final tongogo



Jessica Pegula

**New York, Rongjui/Sept. 05 (Agencies):** Bodhbarnü Jessica Pegula-i world number 1 Iga Swiatek tsükdakja taküm US Open semi-finals tongteter America nung asayar pezü buba kumogo.

Quarter-finals trok tashinung tsükba sülen Pegula-i 2022 champion aser French Open pezüben koka alila Swiatek madak 6-2, 6-4 agi takok ngua asayamung tulu nung semi-final mezüngbuba tongtetogo.

Arishi küm 30 tain Pegula ya Czech Republic tsür Karolina Muchova den asayatsü.

Lai aji ajangtetra aser Brehostibarnü danga semi-final nung Emma Navarro-i world number two Aryna Sabalenka madak takok ngura, US Open 2024 tetsür kija asayaba final ya America tsürtem kistung asayar akumtsü.

Kasa mapang küm 12 tejakdang Andy Murray-i Australia nung Alex de Minaur madak 6-3, 7-5, 6-2 agi akokba sülen Draper ya British nung teburtem rongnungi semi-final mezüngbuba tongteter kumogo.

Seed 25 buba nung alisang Draper ya semi-final nung World Number One Jannik Sinner den asayatsü.

“Tanübo nia semi-finalist ka ta shitetsü. Ni aiben (quarter finals) nung tsükogo,” ta

American tsür Pegula-i Swiatek madak pezüben buba takok anguba sülen ashi.

“Tereprangertem dang pelar. Ni mejashitsüsa asayatsü merang. Lai junga masayatetdak ni tenük yok aser yangji tajangzük angu,” ta lai ashi.

Swiatek ya unforced errors 41 liasü.

Kasa asayamung tebur kija quarter finals asaya ka nung World number one Jannik Sinner-i taoba champion Daniil Medvedev madak takok ngua Jack Draper den semi-final asayatsü jangaogoo.

Italy nung Sinner yagi Russia nung seed pongu buba nung alisang Medvedev madak 6-2, 1-6, 6-1, 6-4 agi akok.

Teburtem asaya nung asayamung tulu akoker asayarji January ita Australian Open akoksang Sinner aser Medvedev dang anünga liasü aser tena asaya repringtsü kanga yongya liasü.

Ajisüaka tenaprongi jangratema masayatet.

Taoba küm aser 2019 küm iba asayamung final nung tamakok ajurusang Medvedev yagi double faults trok aser unforced errors 57 tashi angu.

Sinner ya junga masayatetaka serve nung pa tajungba liasü aser tena ghonda ana ser minute 39 asaya liasü.

## Olympic athlete Rebecca Cheptegei süogo



**Nairobi, Rongjui/Sept. 05 (Agencies):** Olympic athlete Rebecca Cheptegei, shiba dak la tetong tejenbai petrol shiloktsür mi senloksü, la anogo ishika lir süogo.

Arishi küm 33 tain Uganda nung marathon asemer Cheptegei ya tawa Paris Olympics nunga toktepa liasü aser Deobarnü lendong nung la temang kanga mejungi rongsa.

Cheptegei ya lar jala ana den tekülem kidangi nungi meyipa shilangba sülen iba lendong ya ajuru, ta la training agia alidak nortg-west Kenya nung ketdangsur temi ashi.

La tebu Joseph Cheptegei-i ashiba agi, pa kanga yariba jala ka samaogo. Külem Ugandan athlete James Kirwa-ia lai külem asemteper tem senotsü agi yariba indang shia liasü.

Parnok aliba tesem nung ketdangsur kati osang agütsüba nung, Cheptege aser la indang ex-partner ya ali ka mechi mangatetep adoka liasü, ta ashi. Police temia bushisüngdang tenzükogo ta ashir.

Cheptegei yagi Kenya indang elite athletics training centres anasa alitsü mechi Trans Nzoia county nung ali ka alia ki ka yanglu ta ashir.

Kenya nung tetsür dak züka merenshiba tebilemtsü kanga tulu kumogo. 2022 küm tetsür shilem 34 bo züka merenshiba ajangshia lir ta national survey kati ashir.

“Iba lendong yagi ‘gender-based violence’ tekeratiba nung azüoktsü nungdakba sayur, koba ajanga elite sports nung dena kongshir,” ta Kenya indang

Sports Minister Kipchumba Murkomen-i ashi.

Mozüki kima nungi osangbener den jembidang Joseph Cheptegei-i Kenya sorkar dang lar jala asüba atema ochi obendang agütsütsü asüngdanga liasü.

Eldoret nung aliba Moi Teaching and Referral Hospital nung consultant Dr Kimani Mbugua-i ashiba agi, mozüki nung staff temi la kumzüksü meranga mapa ajak inyakdangogo, saka la temang kanga sashia rongsar aliba mechi temang shilem balalai mapa meinyakteti tanep 5:30 ako nung asü.

“Lai onok nem senotsü teyaria agütsü aser la Olympics nungi meyipa shilangba sülen künema training shoes alitsü. La ya keyi ama liasü,” ta Kirwa-i mozüki nung Cheptegei semdangba sülen ashi.

Uganda indang athletics federation-ia social media X nung la asüba indang lemsatep aser la dak mapa tamajung inyakba aija liasü.

Cheptegei indandang taoba tetong ya Eldoret nung mozüki nung mungtar saka pa temang tajemba ronger lir. Pa tang intensive care nung lir saka temang tajungba akumer ta ashir.

Tawa Paris Olympics marathon nung Cheptegei ya 44 buba jenjang nung liasü. Lai 2022 küm Chiang Mai, Thailand nung World Mountain and Trail Running Championships alidang gold ngua liasü.

## BILEMDANGANG

“Nü mulungjang nung tajung mali tashi nai alima nung tajung kecha nunga mangutsü.”